

DISSERTATIO MEDICA, DE RESPIRATIONE.

CUJUS veritatem tueri conabitur, in Augustissimo
Monspeliensis Apollinis fano, ANDREAS MILLOT,
Altissiodoreus artium Liberalium Magister, Medicinæ
studiosus & Universitatis Consiliarius.


P R Æ S I D E

R. D. JACOBO CHASTELAIN,

*Regis Consiliario & Medico, in almâ Monspeliensium
mèdicorum Academiâ Professore Regio dignissimo.*

Die mensis Novembris anni 1721.

Pro primâ Apollinari Laureâ consequendâ.



MONSPELLI,
Apud JOANNEM MARTEL, Regis, Universitatis Cleri & Urbis
Typographum.

M. D C C. X X I.

DISPUTATURI

PROFESSORES REGII.

R. D. Franciscus Chicoyneau , *Cancellarius
& Judex.*

R. D. Joannes Bezac , *Decanus.*

R. D. Petrus Chirac , *Serenissimi Principis Regni
Administratoris Archiater.*

R. D. Antonius Deidier.

R. D. Petrus Rideux.

R. D. Antonius Magnol.

R. D. Joannes Astruc , *R. D. Chirac Coadjutor.*

R. D. Henricus Haguénot.

R. D. Jacobus Lazerme , *R. D. Bezac Coadjutor.*

DOCTORES ORDINARII.

M. Joannes Delherm.

M. Antonius Cairol.

M. Hugo Gourraigne.

M. Garrotus Fitzgerald.

M. Olivier Villeneuve.






Grave par E. Desrochers a paris

rue du foin pres la rue S. jacq.



*In omnibus Exemplum bonorum operum
in doctrinâ, in integritate, in gravitate:
Epist. ad Tit. C. 2. v. 7.*

offendit Andream Milloa Anagrammatorum.



ILLUSTRISSIMO
ECCLESIAE PRINCIPI
DOMINO DOMINO
CAROLO DE THUBIERES
DE CAYLUS,
REGI A CONSILIIS
ET
ALTISSIODORENSI EPISCOPO.

PRINCEPS ECCLESIAE ILLUSTRISIME,

Nunquam sanè opusculum hoc tibi offerre ausus fuisset, ni jamdiù publicum observantiae & gratitudinis monumentum palam proferre optassem, hoc primum enim iatricæ artis tentamen non tanti facio, ut existimem tantum me promereri Patronum, quem commendant maximè non solum generis Claritas, avorum Illustrium nomen, ve-

rūm & etiam præclara animi Dotes, quibus venerationem & amorem omnium tibi Concilias. Taceo facundiam illam quam non semel mirata est Gallia, dum à Clerico ordine, & burgundiâ delegatus utriusque amorem & obedientiam Regi eleganter expressisti, ut ceteras dotes prædicem, quibus vix quisquam par esse tibi possit, omnibus enim mansuetus, affabilis, & officiosissimus es, sed & quod Pastorem magis decet, **PRINCEPS ECCLESIAE ILLUSTRISSIMAE**, pietas insignis & Pastoralis sollicitudo te maximè commendant, oves divinâ providentiâ tibi commissas verba salutis doces, earum necessitatibus attentè invigilas, ac veluti Pater omnium bona temporalia, simul & cælestia ipsis largiris; Nec sine admiratione vidimus, dum Magna Ciborum penuria totum ferè Regnum vastabat Rebus etiam ad vitam necessariis libenter te spoliare, ut ovibus ciborum egenis liberali munificentia succurreres, his virtutum ornamentis ardens Religionis amor jungitur, ut nihil eorum tibi desit quæ præsulem verè purpurâ dignum efficiunt. Verum quid plura commemorem, superest mihi singularem illam extollere humanitatem quam hodie expertus sum, cum adeò tenues laborum Academicorum primitias humanissimè acceperis, ac potentissimum Patrocinium mihi non recusaveris, cujus sanè beneficii nunquam immemor grates **CELSITUDINI TUÆ**, agere non cessabo, ac vota deo semper rependam, ut præsulis adeò beneficii, tantis virtutibus condecorati, ac populo suo chari dies augeat, hac summa votorum est illius qui profundissimâ cum veneratione gloriatur, semperque gloriabitur esse,

**PRINCEPS ECCLESIAE ILLUSTRISSIMAE,
CELSITUDINIS TUÆ,**

Observantissimus & obedientissimus Client

ANDREAS MILLOT.

Dabam Monspelii die 20.
mensis Novembris anni 1721.



DISSERTATIO MEDICA

DE RESPIRATIONE.

ECONOMIÆ Animalis viget integritas, plurimum functionum ope, neque tamen omnium par est ad vitam conservandam necessitas, quædam, ex instituto naturæ Animalibus tantopere necessariae sunt, tantique momenti ad vitam tuendam, ut iis etiam per aliquod temporis intervallum absque interitu orbari nequeant, inde functiones vitales, quæ à medicis duæ recensentur, motus cordis & respiratio, utriusque functionis organa in Thorace, seu mediâ Corporis cavitate sunt, Pulmo cæteræque partes parietes Thoracis constituentes respirationis exercitio famulantur, inter quæ plures muscoli recensentur. Horum contractionis ope modò Thorax ampliatur, modò constringitur, ac proinde aër modò ad Pulmonem descendit, modò ex ipso expellitur. Ex quo fit ut quoniam muscoli respirationis tam ad nutum & imperium animæ, quam structurâ Mechanicâ partium contractiones suas edere possint, ad libitum quoquè hæc functio intendatur ac remittatur, tametsi per notabile temporis intervallum sine interitu aboleri non possit.

Quoniam verò ut respirationis ratio, ususque clarius pateant, plura sunt examinanda, idcirco perutile fore existimavimus, ea omnia plurimum propositionum serie exponere.

PROPOSITIO I^a.

Quid sit Respiratio inquiritur, inspiratione & expiratione componi demonstratur.

HUjus propositionis veritas nullâ rationum serie indiget, ut demonstretur, cum solâ expositione pateat, eâ enim est homini vivendi necessitas, ut absque respiratione diu vivere ne-

queat ut quisque facile experiri potest, hinc tamdiu homo vivere creditur, quamdiu respirat, verum si modum respirandi consideremus, modò aërem, ampliato Thorace, ad Pulmones descendere, modò eodem contracto ex ipso exire videbimus, adeo ut hi duo motus, quamdiu vivit homo indefinenter sibi succedant, ergo ex eo manifestum est, respirationem hoc duplici Thoracis motu componi, cum, ut homo respiret, aër modò ad Pulmonem descendere, modò ex ipso exire debeat; motus autem is quo Thorax ampliatur, & aër ad Pulmonem descendit, inspiratio vocatur, alter vero quo pectus contrahitur, & aër è Pulmone exit expiratio dicitur. Unico motu respirationem componi non potuisse ex ipsius utilitate evincitur, etenim cum ad usus maximos aër ad Pulmonem descendat, si aër primâ vice inspiratus per totum vitæ decursum in Pulmone contineretur, parum elasticus, ac pluribus halitibus foetus Pulmoni minime utilis esset, necesse igitur est ut inspiratus aër postquam suo officio functus, tanquam inutilis è Pulmone expellatur, ut alteri puro & elastico locum cedat, unde facile colligi potest respirationem, inspiratione & expiratione reciprocantibus componi debuisse, atque adeo ex dictis satis patet respirationem esse reciprocam Thoracis dilatationem & constrictionem quarum alterâ aër in Pulmonem admittitur, alterâ emittitur.

P R O P O S I T I O I I^a.

Quænam sint Respirationis instrumenta seu quæ sint Corporis partes huic facultati exercenda necessaria.

QUandoquidem respiratio in mediâ Corporis cavitate fit, ibi organa respirationis esse oportet, ac propterea Pulmo præcipuum respirationis organum est habendus; is enim & situ & peculiari structurâ ad aërem recipiendum quasi factus videtur, habet enim fistulam à Thorace ad jugulum extensam, oreque patulo in oris cavitatē hiantem; quæque inductus minores & minimos tracheales divisâ totam Pulmonum compagem subit, ut aërem quem rimâ superiore ex ore accepit, ad omnes Pulmonum lobos majores & minimos deferat, verum Pulmones aërem admittere nequeunt, nisi turgeant, nec turgere, nisi cavitas Tho-

racis amplietur, superest igitur ut nunc inquiramus, cur parietes Thoracis à Pulmonibus in inspiratione recedant, verùm Anatomia nos docet hos parietes ossibus & musculis præcipuè componi, ergo ampliatio Thoracis seu motus inspirationis ab his repetendus est, at ossa nullum habent principium motûs, sed à musculis contractis moventur, ergo Thorax musculorum contractione ampliabitur & contrahetur, seu respiratio à contractis musculis absolvetur.

P R O P O S I T I O III^a.

Pulmonum structura exponitur, eosque ex ductibus Trachealibus, membranis & vasis sanguiferis præcipuè componi demonstratur.

Pulmo est pars mollis & flacida cavitatem Thoracis pro maximâ parte replens, pluribus coagmentata vesiculis ac membranis, respirationi dicata. Connectitur superius faucibus & collo per asperam arteriam, vertebri & sterno per mediastinum, aliquando etiam ad latera pleuræ adhæret per quosdam fibrosos nexus dividitur in duos lobos majores, dextram & sinistram Thoracis cavitatem replentes, qui rursus in plures alios minores dividuntur, quique in Embryonum Pulmonibus sine ullâ præparatione, ullove artificio manifestissimè patent: Attingi etiam possunt lobuli, si semel inflatus pulmo solis radiis vel lumini obiciatur, interstitia enim quædam quasi Diaphana Emergent, quæ si levi incisione prosequaris, lobulos utrimque asperæ arteriæ & vasis adhærentes sejunctos reddes & propriâ involutos membranâ inspirato aëre per trachæam experieris. Clarius tamen videri possunt factâ levi Pulmonum elixatione & elaboratâ interstitiorum sectione, inde Malpighius existimat Pulmones esse aggregatum quid ex levissimis & tenuissimis membranis quæ extensæ & sinuatae infinitas pene vesiculas orbiculares variè compressas efformant, non alias quam in apum favis accidit, quæ talem habent situm & connexionem, ut ex Trachæâ in ipsas mox ex unâ in alteram patens sit aditus, & tandem desinant in continentem membranam.

E faucibus ad Pulmones extenditur fistula quædam oblonga ex variis cartilaginibus & membranis composita, aspera arteria

dicta, aëri pro respiratione liberum transitum ad Pulmones, indeque rursus foras concedens; caput seu ejus initium Larynx nuncupatum ex quinque cartilaginibus figurâ & nomine diversis componitur, harum maxima quæ à parte anteriori conspicitur ac quodam monticulo inferiùs prominens Tyroïdes & scutiformis nominatur. Altera à figura Cricoïdes seu annularis dicitur. Tertia & quarta græce Arytenoïdes, quæ rimam Laryngis glottis dictam efformant, cui quinta superponitur cartilago, epiglottis nuncupata, quæ modò depressa modò erecta, modò rimam claudit, modò apertam pro necessitate relinquit, hæ cartilagine simul articulatae, vinculis membranaceis in situ retinentur, ac membranâ tenui sensu exquisito donatâ intus vestiuntur, ubi plures sed diversæ magnitudinis glandulæ observantur, humorem eas oblinientem eructantes. Habent præterea plures musculos quorum ope moventur, ut Larynx dilatari atque constringi possit, & nervos recurrentes dictos ab octavo pari accipiunt.

Laryngem excipit asperæ arteriæ truncus qui componitur ex cartilaginibus beneficio membranarum connexis, & fere æqualiter à se invicem distantibus, quæ singulæ representant circum imperfectum, à parte enim posticâ, ubi Trachæa æsophago incumbit in membranam abeunt, ne cartilagine duriores deglutioni sint impedimentum. Membrana cartilagine colligans in parte posticâ valde carnosâ, in anticâ cartilaginea magis & tendinosa, neque ibidem integra est, sed per singulos annulos intercisa, constat fibris transversis, quibus aspera arteria constringi videtur. Intus vestitur trachæa membranâ tenui fibris longitudinalibus constante, sensu acutissimo præditâ. Inter hanc tunicam & priorem plurima parva vascula, plurimæquè exiguæ glandulæ interjacent, humorem secernentes, quo interna trachææ superficies illinitur.

Hæc vero fistula cavitatem Thoracis ingressa in duos ramos insignes divisa, utrumque Pulmonum lobum attingit, atque horum quilibet arteriarum venarumque more in ramos alios minores, minimos, & tandem insensibiles divisus universam Pulmonum substantiam percurrit, ut inspiratus aër undique in Pulmonibus distribuatur, quod ex eo sufficienter demonstratur, nam si aër per Trachæam insuffletur, aut liquidum quodpiam vi sufficiente, ex Trachæâ in Pulmones adigatur, tota illic Pulmonum

Pulmonum moles intumescit. At quoniam rami è Trachæa nascentes ejusdem sunt divisiones, ergo eadem est illorum ac Trachæa è quâ oriuntur compositio, & per consequens ductus Trachæales Pulmones percurrentes, ex cartilaginibus circularibus constabunt, quorum tunicæ fibras musculares utriusque generis, scilicet transversas & longitudinales, unâ cum glandulis humorem bronchia lubricantem eructantibus obtinent. Unde concludere licebit etiam minores quasque asperæ arteriæ fistulas, constantes fistole & diastole vices habere, scilicet omnes dum exspiratio peragitur contrahi, dumque aër inspiratur relaxari.

Cartilagines illæ vesiculas efformant quæ invicem communicantes suâ ferie ductus verè vesiculares componunt, ut sic aëri facilis pateat aditus. Hæ verò cartilagines majores & duriores sunt in trunco, minores atque flexibiliores in ramis, & quò ramorum ulterior fit divisio, eò quoque vesiculæ minores & flexibiliores observantur, adeò ut in furculis minoribus, & insensibilibus, membranæ naturam obtineant. Ductum Trachæalium extremitas vesiculâ membranaceâ cæcâ & in alteram non hiantem terminatur, quo fit ut inspiratus aër cum ulteriùs progredi nequeat adveniente expiratione iterum per Trachæam exeat. Habent bronchia arteriam propriam Ruischianam ab inventore dictam quæ ortum sumens ab aortæ descendente posticâ parte, Pulmones obliquè subit & bronchia serpens ad extremum usque comitatur, ita ut ne minimus quidem asperæ arteriæ ramus hac arteriâ bronchiali destitutus humanâ industriâ demonstrari queat. Variis autem locis hæc arteria anastomosibus associatur ramusculis arteriæ Pulmonaris, ita demonstrante Clarissimo RUISCHIO, Repletâ enim arteriâ Pulmonari ceraceâ materiâ, illico quoque repleti conspiciuntur ramuli arteriæ bronchialis. Vena ejusdem Cognominis huic Comes est sanguinem ad cavam reportans.

Ductus Trachæales rete quopiam membranaceo horum intervalla occupante ligantur, quod ex furculis ferè infinitis arteriæ venæque Pulmonaris componitur, quorum quamplurimi ad ductus Trachæales propagati ipsorum vesiculas excurrunt, ut ad glandulas bronchiales sanguinem & humorem secernendum afferant, ex quò patet ratio, cur liquidum in arteriam Pulmonarem injectum non tantum per venam ejusdem nominis redu-

catur, verùm etiam aliqua illius portio cavitatem vesicularum Trachæalium subeat.

Pulmones arteriam habent insignem Pulmonariam dictam à dextro cordis sinu oriundam magnam sanguinis copiam ad ipsos devehentem, quique pluribus venulis acceptus per venam Pulmonarem ad auriculam & Thalamum cordis sinistrum reducitur. Nervos quoque obtinent à pari vago & intercostali, tamen si ob laxiorem contextum sensu acuto non donentur. Lymphatici etiam ductus ex ipsis ducunt originem, Lympham ad Canalem Thoracicum deferentes. Demùm universa Pulmonum moles membranâ Tegitur tenui, sed validâ sensu exquisito præditâ, quam pleuræ productionem plerique Anatomicorum esse opinantur.

P R O P O S I T I O IV^a.

Plures muscoli inspirationi, seu Thoraci dilatando inserviunt, qui utrimque positi ratione insertionis & originis, in diversas partes nitentes costas cum sterno annexo ad rectos angulos super vertebrae Thoracis attollunt, unde circulum majorem describunt, totâque costarum serie sursum ac deorsum distractâ, Thorax undequaque ampliatur & sic Pulmonibus inflandis locus major conceditur.

HÆc propositio ex Anatomicis patet, cum è numero & situ musculorum Thoracem dilatantium sit repetenda. Thoracem dilatant subclavius, intercostales externi, & interni, serratus posticus superior, serratus anticus major, costarum levatores à sterno detecti, & demùm ipsum Diaphragma quorum principium & finis cum sint diversa, debent quoque dum simul omnes nituntur in partes diversas trahere. Nam subclavius intervallum à Claviculâ & primâ costâ relictum occupans contractus costam versus Claviculam ducet, quia contractione abbreviatis hujus fibræ, pars mobilior nempe prima costa ad minus mobilem & fixam seu Claviculam necessariò ducenda est, verum simul & eodem tempore muscoli intercostales tam externi quam interni contrahuntur, quorum fibræ obliquæ & se decussantes ab imo costæ superioris ad subjacentis summitatem feruntur, ergò secunda costa ad primam, tertia ad secundam, & sic reliquæ costæ movebuntur. ita ut inferior semper ad su-

periolem ducatur, cum Clavicula veluti principium & punctum fixum motus costarum habenda fit cui costarum motui favent adhuc plures alii muscoli ut ferratus anticus major qui à basi scapulæ ortus quinquè veris & inferioribus costis totidem digitationibus implantatur, item ferratus posticus superior, qui à spinis trium vertebrarum inferiorum colli, & à spina supremæ dorsi principio lato exortus, desinit tripartitus in margine superiore trium quatuorve costarum superiorum caudâ brevi parumque tendinosâ, his costarum levatores à Stenone descripti adduntur, oriuntur à processibus transversis undecim vertebrarum dorsi & infimæ colli, & desinunt singuli in singulis costis, nempe superiores magis in margine illarum superiori, inferiores magis in costarum dorso, undè sequitur musculos istos, dùm circa radices suas abbreviantur costas retro trahere, adeoque dùm hi muscoli simul cum subclavio & intercostalibus tam externis quam internis contrahuntur, costæ omnes sursum elevatæ angulos cum spinis obliquos in rectos mutant, cui motui ossa sterni firmiter costis articulata obsequuntur, sic Thoracis cavitas capacior redditur, cui ellipsi ut succuratur (nam costæ in maximâ quoque inspiratione elevatæ numquam perfectum circulum sed ellipsim tantum representant.) Diaphragma duplici musculo constans, per quos & costis & vertebris lumborum alligatur, unâ cum costis sursum tractis inferius ad tensitatem ducitur, proinde ut pectus quasi Tympanum undique strictum capacissimum evadat, ac intercâ Pulmones, spatio ampliore iis concessio, ab aëre quâ datâ viâ irruente inflantur, & totam Thoracis ampliati cavitationem implent.

PROPOSITIO V^a

Thorax contrahitur, & expiratio fit non solum quia costæ cum annexo sterno prius elevata proprio pondere ad obliquos angulos super vertebrae Thoracis decidunt, sed præcipue quia muscoli expiratorii sunt, Thoracis contractioni servientes.

DUm muscoli inspirationi inservientes à contractione cessant, costæ statim à positione rectâ in obliquam decidunt, simulque Diaphragma à tensitate laxum, in pectoris cavitationem

ascendit seu potius à visceribus abdominis illuc protruditur, adeoque ob partium situs ita mutatos, pectoris constrictio & expirationis actus succedit, quod à musculorum quibus inspiratio peragitur, intermissione, pondereque partium quæ antea fuerant elevatæ procedere posse videtur, cum in defunctis sub tali positione reperiantur. Huic tamen assensum non facile deberi existimo, quia interdum expirationis, multò fortius & vehementius munus peragi debet, pro ut in tussi, cantu, vociferatione, aliis que quorum exercitia pectoris labor difficilis, graviores que nixus sunt.

Quapropter non est ut arbitremur expirationis actus hujusmodi intensos à merâ musculorum quiete quin verò ab aliorum oppositorum motu excitari. Sunt autem muscoli ad pectus constringendum dicati sacrolumbus, ferratus posticus inferior & triangularis, quibus Verheyen alios in parte concavâ Thoracis sitos ac stenonis levatoribus antagonistas adjungit, cum ordine opposito incedant, & à costa inferiore exorti, in superiorem inferantur, qui perinde costas deprimentes thoracem constringunt. Sacrolumbus ex osse sacro & spinis lumborum pullulat, adjacet longissimi dorsi externo lateri, à quò circa primam thoracis vertebra nonnihil reflectitur extrorsum ad costas, quas singulas singulis tendinibus quandoque binis apprehendit, ferratus posticus inferior à spinis duarum inferiorum vertebrarum dorsi & trium superiorum lumbarium exurgit, & quatuor costis inferioribus affigitur. Triangularis qui non unicus musculus est, sed quatuor aut quinque componi videtur, in internâ superficie sterni situm habet, & tendines utrimque ad costarum cartilagineas mittit, ita tamen ut principium musculi cujuscunque tendine sit semper inferius.

Ex hoc musculorum prædictorum situ, quis non videt, his contractis pectus esse coarctandum, ponè enim sacrolumbum, ferratum posticum inferiorem & triangularem simul contrahi, abbreviatis illorum fibris. Extremitates ad invicem ducendæ, seu longitudo musculorum necessario imminuenda, adducetur ergò (ut musculis contractis accidere solet) extremitas mobilis ad alteram fixam & minus mobilem, seu tendo musculi ad caput accedet, ergò quoniam muscoli thoracem constringentes principium habent in partibus fixis & minus mobilibus quam sunt

sunt ipsæ costæ, debent dum contrahuntur costas ducere ad suum principium, seu deorsum trahere quæ inclinatæ super thoracis vertebrae ab angulis rectis declinant, & obliquos cum ipsis constituunt, quod sanè absque thoracis contractione fieri nequit.

His addere possumus contractionem musculorum Epigastricorum viscera abdominis, dum expiratio fit intus repellentium, quæ hoc impulsu Diaphragma jam laxum premunt, ac in cavitatem thoracis protrudunt. Cum hi muscoli adveniente inspiratione à visceribus abdominis contracto Diaphragmate versus inferiora repulsis exterius impulsæ ad se contrahendum sollicitentur, ex his omnibus attentè consideratis inferre licebit, non à pondere costarum & annexi sterni aut aliarum partium thoracis parietes constituentium, vel remissâ musculorum inspiratorum contractione, sed à musculis antagonists contractis thoracem constringi & animal expirare.

P R O P O S I T I O VI.

Quandoquidem musculos ab influxu liquidi nervorum contrahi supponimus, non erit respiratio, nisi prius hoc liquidum ad musculos respiratorios influxerit, adeoque cause inquirendæ sunt, hunc influxum ad musculos respirationis proritantes, nec non cur hic motus per totum vitæ cursum perseveret & quæ fuerit inchoandi ratio atque necessitas.

EX prægressis constat respirationem dilatatione & contractione thoracis reciprocâ exerceri, ex iisdem adhuc certum est plures esse musculos tam inspirationi quam expirationi inservientes, sed in Physiologicis supponitur liquidum nervorum esse illud quod præcipuè facit ad contractionem musculorum, ergò ex his jam satis patet veritas primæ partis hujus propositionis, videlicet respirationem exerceri non posse nisi prius liquidum nervorum ad musculos respiratorios influxerit, cum hoc influxu sint contrahendi. Idcirco superest nunc ut causas inquireamus influxum hujus liquidi ad musculos respirationis proritantes. Verum experientiâ scimus naturam inter musculos respiratorios & plures partes ac præsertim Pulmones, Trachæam &

fauces consensum per nervos statuiffe, ergò in iis quærendus stimulus quo liquidum nervorum ad musculos respirationis fluere incitatur, atqui sanguis per totum vitæ decursum indefinenter per Pulmones provolvitur, & filamenta nervorum Pulmonum substantiam excurrentia in circuitu suo movet atque succutit, ergò in Pulmonibus quamdiu vivit animal adest stimulus liquidum nervorum ad musculos respirationis determinans, ob consensum quem inter has partes author œconomiae animalis posuit, adeoque dato in Pulmonibus stimulo, influxus liquidi nervorum ad musculos Thoracis Sympathicus sequetur.

Sed & membrana trachæam atque fauces obducens sensu acutissimo est prædita, poterunt ergò propagines nervorum eas percurrentes levi de causâ succuti, & influxus Sympathicos juxta statutas naturæ leges ad musculos respirationis determinare, hinc aër continuò per fauces & trachæam motus, erit quoque alter stimulus quo respiratio promovebitur, tum proprio liquidi & elasticitatis motu cum corporum extraneorum quæ secum rapit miscelâ, inde fit ut fumus, aut pulvis ab aëre in fauces & trachæam rapti respirationem multum intendant. Verum non est necesse, ut dum hæ causæ in statu naturali sunt harum stimulum percipiamus, cum & huic à nativitate assuefacti simus, & præterea non vehemens, neque nimius sit. Quoniam vero nervi qui in Pulmonibus, trachæâ & faucibus distribuuntur, partim ab octavo pari & intercostali, partim à medullâ spinali exoriuntur, hinc respirationis actus partim voluntarius, partim Mechanicus est, cum ad libitum animæ intendi atque aliquamdiu remitti possit, quanquam eo diu carere sine vitæ detrimento non liceat.

Ex quibus facile deduci potest inchoandi respirationem ratio atque necessitas, nam ut primùm fœtus ab utero fuit exclusus, aër quo tum innatat cuticulam teneram graviter afficit, ac liquidum nervorum in cerebro validius commovens ad musculos respirationis determinare potest, sed præsertim gravitate suâ & elatere, nec non motu liquidi in fauces & trachæam ruens, nervos harum partium impetit, & liquidi spirituosus ad musculos thoracis Sympathicum influxum sollicitat, quo thorax dilatatur, adeoque superatâ externi aëris resistentiâ, Pulmo aëre ingrediente expanditur, ac sanguis ad vasa ipsius referata &

aperta, cum impetu ducitur, ut primum circulum, per totum dein vitæ cursum continuandum, in ipso absolvat. Quæ ita breviter exposita manifestè tamen, respirationem à motu inspirationis semper inchoare, significant, cum expiratio præcedentem inspirationem necessariò supponat, quam foetus ob aëris defectum exercere non potest, ac propterea constans thoracis contractio: & exinde respiratione inchoante liquidi nervorum ad musculos inspiratorios à contractione feriantes, quam ad expiratorios contractos facilius futurus est influxus.

PROPOSITIO VII.

Si reciproca thoracis ampliatio atque constrictio plurimum musculorum contractione fiat, oportet ut causa musculorum contractionem efficiens, quamdiu vivit animal, musculos respiratorios per vices contrahat.

QUoniam de facto is est ordo contractionum in musculis inspiratoriis, & expiratoriis, ut quo tempore muscoli inspiratorii contrahuntur, muscoli expiratorii restituantur, & vice-versâ. Causa igitur ejusmodi musculos in contractionem agens, de facto hos omnes musculos non contrahit eodem tempore, sed quum contrahit expiratorios, jam contraxit inspiratorios. Sed liquidum nervorum est illud quod musculos contrahit, dum è nervis in eorum sinus influit, non influit igitur in musculos expiratorios, & inspiratorios eodem tempore, sed postquam influxit & contraxit musculos inspiratorios, influit & contrahit expiratorios, quare influxus liquidi in hos musculos non est de facto continuus sed interruptus. Verum causa influxum liquidi ad musculos respirationis sollicitans, est continuò præsens & eodem modò agit, ut ex dictis superiùs patet, ergò interruptus ille influxus non à causâ influxum promovente, sed à musculorum dispositione repetendus, quâ fit ut omnes in contractionem simul venire non possint, seu liquidum nervorum eodem tempore accipere, quia antagonistæ sunt, idest motibus contrariis destinati, nam manifestum est nervos musculorum contractorum distrahi, quâ distractione cavitas eorum angustata liquido influxuro minùs patet, fluet ergò hoc liquidum, vi quâ ad influ-

sum determinatur , in musculos non contractos seu relaxatos quorum nervi distractionis immunes magis patent , ac perinde tametsi causa influxum liquidi ad musculos respirationis promovens continuò & sine intermissione agat , erit tamen interruptus hujus influxus , seu modò ad inspiratorios , modò verò ad expiratorios musculos influet , quia nervi eorum per vices patent. Dico jam secundò illam cessationem ab influxu in expositos musculos fuisse necessariam , ad hoc ut esse & conservari posset animal , si enim fieri potest ut non sit necessaria illa cessatio , sed influxus liquidi per nervos sit continuus in musculos expirationis & inspirationis , igitur utrique illi musculi in perpetuâ contractione persistent , seu Thorax eodem tempore dilatabitur atque contrahetur , quod sanè implicat , adeoque aër nec ingredi , nec expelli è Pulmonibus poterit , sed sine respiratione nec esse nec conservari animal post nativitatem potest , adhuc igitur ut esset & conservaretur animal , oportuit ut liquidum nervorum non continuò sed per intervalla influeret in musculos respirationis , quare patet ejus influxus reciproci necessitas.

P R O P O S I T I O VIII^a.

Quoniam inspiratio fit aër in Pulmones irrûit , non præcisè quia à Thorace dilatato pellitur , sed præsertim suo pondere & elatere.

A Erem à thorace dilatato pelli non negamus , id enim mundi plenitudo evincit , ac experimento Clarissimi SUUAMMERDAMI demonstratur , si vivo cani aspera aperiatur arteria , in eamque tubulus aliquis immitatur oblongus , verùm ita inflexus ut , postquam vinculo trachææ arctè priùs alligatus , ac in vas aliquod angustum aquâ plenum postea cum cane immissus fuerit , supra vasis margines altera Tubuli pars emineat animalque sub aquis jam versans ejusdem Tubuli beneficio liberum ac pro necessitate sufficientem aërem haurire possit , notatur tunc temporis , in inspiratione propulsam à dilatato pectore aquam , ad vasis margines assurgere , sic que eodem etiàm momento è propulsâ ac sursum motâ aquâ aëri in vase per aquæ superficiem expanso ubique contiguâ , aërem itidem propulsam ac de loco motum pectus ingredi. Hoc enim experimentum

mentum aërem ad aquarum exemplum dilatato pectore impulsu moveri demonstrat, quanquam hâc unice de causâ pectus ingredi evidenter non comprobetur, nam experienciâ attestatur, hominem spiritum ex magno vase aëre pleno cum tenui collo trahere, tametsi os illius orificium colli obtegat, & nares compressione penitus clausæ aëri aditum nullum permittant, cum aër vasis ab ambiente separetur, neque ullo impulsu pectus ingredi cogatur.

Quod magis adhuc patebit, si ad naturam aëris attendamus, qui ex tenuissimis spirulis, flexibilibus, ramosis, elasticis, poros, suomodò gravitantibus, ac motu continuo agitatibus constans, ut quaquaversum se diffundat nititur, ex quò fit ut ubi minùs premitur huc facilè & suâ spontè naturâ illicò feratur. Pondus verò aëris plura experimenta demonstrant, vesica aëre plena gravior est ipso vacuâ, ut solertissimus BOYLE demonstrat, pariter occluso orificio Clysteris, magna ob aëris pondus adhibenda est vis ut Embolus extrahatur, ejusdem aëris pondere fit, ut aqua, & quæcumque alia fluida gravia, in tubis ad determinatam altitudinem ascendant, quæ sanè sufficere videntur ad Rem adeò certam stabiliendam. Nec minùs evidentibus comprobarur Argumentis, vis aëris elastica, cujus effectus sunt adeò sensibiles, ut vix quidquam certius in Physicis habeatur, hinc Æolipilæ, Thermometri, fontium nonnullorum undas cum impetu in altum projicientium, ac sclopetorum glandes aëre pellentium ratio, ac demum sine aëris elatere concipi non posset, cur vesica in valle aëre semi repleta infletur ac omninò tumeat, dùm ad verticem montis defertur, cum aër externus poros vesicæ collo strictè ligato pervadere nequeat, quibus ita expositis facile patet, aërem pondere & elatere suo continuò niti ut pectus ingrediatur, ac propterea thoracis dilatatio ad inspirandum necessaria est, non præcisè ut aër in Pulmones pellatur, sed ut ampliato thorace, sufficiens ingressuro aëri spatium concedatur, atque Pulmonum tollatur pressio, cum pondere & vi elasticâ aëris ingressuri æquilibrans, & idircò non forsan averitate aliena est opinio eorum qui thoracem cum Pulmonibus, vesicæ follibus inclusæ assimilant, quæ dilatatis follibus aëre repletur.

P R O P O S I T I O IX.

Aër è Trachæa per vesicularum Pulmonarium seriem, ad lobos omnes Pulmonum ducitur, unde tota hujus visceris moles in inspiratione inflatur, nec minima illius pars concipi potest, quæ aëre inspirato non repleatur.

HÆc propositio ex supra allatis de Pulmonum structurâ tam facilè deducitur, ut non nisi simplici expositione egere videatur; quid enim bronchia sunt præter seriem plurium vesicularum mutuò communicantium, quæ ita per Pulmones disperguntur ut ne minima eorum pars sit quæ ductus hos vesiculares non accipiat, verùm has vesiculas è trachæâ nasci in eodem loco demonstratum est, aër igitur dùm inspiratio fit, fistulam trachææ ingressus tum motu fluidi, cùm proprio elatere, ac præsertim compressione alterius incumbentis per totam vesicularum seriem movebitur, ac per consequens totam Pulmonum substantiam pervadet, repletis ergò vesiculis Pulmonariis ac aëre turgentibus, totâ molem Pulmonum inflandâ quis non videt, cùm nulla ipsorum pars sit quæ bronchia non habeat, quare mirum nemini videatur, cur in animalibus denatis aëre per trachæam insufflato totus illico Pulmo inflatur, atque in vivis dùm fit inspiratio tantoperè expandatur, ut cavitatem thoracis ampliata repleat.

P R O P O S I T I O X.

Inspirato aëre vesiculæ Pulmonares instantè non aëris eas replentis quantitate, sed suo præcipuè elatere, seu vi qua se dilatandi pollet.

QUandoquidem vesiculæ Pulmonares inflari dicuntur, quoties earum parietes extrorsum pelluntur, seu majus inter se spatium relinquunt, ergò eo major futura est earum inflatio, quò major erit parietum recessus seu quò major erit quantitas aëris vesiculas replentis quia major aëris contenti quantitas supponit majorem ipsarum cavitatem, quæ sine majori spaciò dari nequit, ac propterea veritati consentaneum videtur, vesiculas

Pulmonares quantitate aëris esse inflandas undè datâ majori vel minori aëris inspirati quantitate, major quoque vel minor futura est vesicularum inflatio. Verùm si attendamus aërem spirulis tenuissimis, flexibilibus, multumque elasticis componi, facile concipiemus, aërem in Pulmones ingressum propter loci caliditatem, magnoperè esse dilatandum, nam spirulæ aëris priùs compressæ & implicitæ à fluidis insensibilibus quæ per earum poros tùm velociùs rapiuntur commotæ & agitatæ suâ fruuntur vi elasticâ, ac cùm impetu se expandentes, vesicularum parietes extrorsum validè pellunt earumque cavitatem sic magnoperè augment. Quantum autem aër expandi possit dum vi suâ elasticâ fruatur, docet nos solertissimus Boyleus in experimentis Physico-Mechanicis quæ incredibilem se extendendivim, aëri inesse clarè & apertè demonstrant.

COROLLARIUM I^{um}.

DUm aër pluribus halitibus seu extraneis corporibus est foetus, minori vi elasticâ pollet, minùs quoque idoneus ad respirationem esse debet: inde animalia in locis subterraneis, aliis que fumo, pluribusve halitibus repletis difficile respirant, ex eo etiam accidit, ut cœlo pluvioso & humido difficilior sit respiratio, quam sereno & sicco, quia vapores & halitus per aërem copiosè dispersi vim ejus elasticam imminunt, eadem quoque ratione fit, ut si quis è vase quopiam etiam sat amplæ capacitatis spiritum hauriat, post iteratos aliquot respirationis actus, anhelosè respiret, quia idem aër iterum & iterum inspiratus vim suam elasticam prorsus amittit, ac propterea respirationi inutilis fit.

COROLLARIUM II^{um}.

Quoniam superius dictum est, aërem esse liquidum ex pluribus spirulis, flexibilibus continuo nisu se expandendi, seu vi suâ fruendi elasticâ nitentibus, debent ergò ejus partes extendi seu dilatari, quoties earum elater vim comprimentem superat, & eo major erit aëris dilatatio, quo vis comprimens minor erit, verùm quoniam immensa est aëris terram ambientis

altitudo, immensum quoque seu maximum debet esse ejusdem pondus, ex quo sequitur aërem Globi terreni superficiem immediate cingentem maximâ vi se extendendi pollere, quia à superiore maximè premitur, quâ compressione fit ut spirulae ejus Plurimum contortae & plicatae non aditus undequaque patentes ac faciles materiae subtili præbeant.

Alterum verò qui supremam Regionem occupat multum dilatatum ac expansum ulterioris dilatationis vix esse capacem, quia cum parùm aut nullatenus comprimatur, ejus spirulae suo elatere ferè integrè fruuntur, quod & rationi consentit & experientiâ demonstratur, ut ex experimento sexto Physico-Mechanico Boylæi patet, assumpsimus inquit vesicam agninam, lentam & plicabilem aquâ benè madefactam ut latera ejus compressa quasi coalescerent, & nihil aëris inter plicas relinqueretur, hujus vesicae cervix collo phialae minutae firmiter super alligabatur, vesicâ interim ipsâ sic antea compressâ ut totus inclusus aër in phialâ solâ isque compressus existeret, paucis deinde exuctionibus per anthliam factis aër exiguae inclusus phialae dilatari cæpit & tumorem quemdam in vesicae collo producere quantoque magis aër ambiens subduceretur, tanto aër inclusus in vesicam penitiùs penetravit, & per gradus latera ejus erexit plicasque expandit, donec tandem ad plenas dimensiones suas eam inflasse videretur; quofacto externus aër in recipiens refluere permissus aërem qui vesicam modò impleverat repulit in pristinam quam priùs in phialâ occuparat loci angustiam, adeoque vesicam in Rugas & flacciditatem pristinam redegit ergò quoniam à terreni Globi superficie ad supremam usque aëris regionem varii sunt altitudinis gradus, varii quoque gravitatis, ac per consequens diversi dilatationis aëris gradus, unde animal quod in infimâ aëris Regione liberum ducit spiritum, si ad altiorem aut supremam transferatur, deficiente respiratione morietur, exinde fit ut super excelsorum cacumina montium respiratio sit difficilior, nec diu ibi stare liceat, ut de olimpo aliisque excelsis montibus narrant; item animalia nulla in recipiente machinae Boylianæ post aëris exanthlationem vivere possunt.

PROPOSITIO XI.

Aër è Pulmonibus expiratione expellitur non solum quia contracto Thorace Pulmones comprimuntur, sed etiam quia in eis est vis aliqua se contrahendi.

DUm exspiratio fit cavitas Thoracis ampliata constringitur, & ejus latera in Pulmones inflatos feruntur unde hujus visceris necessariò sequitur compressio, verùm quoniam factâ expiratione inter Pulmones & Latera thoracis aliquod spatium est, ut in animalibus demortuis observatur, ergò latera thoracis quamdiu exspiratio fit, Pulmones non semper comprimunt, vis igitur altera requiritur quæ Pulmones comprimere non desinat quamdiu exspiratio fit, quo aër & halitus è bronchiis commodè expelli possint. Hæc autem vis in Pulmonibus ipsis residet, nam ut supra propositione tertiâ notatum est, Pulmones membrana tenuis, valida tamen nec non elastica cingit, ipsiusque trachæales ductus tunicâ quæ fibris muscularibus, transversis, & longitudinalibus constat instruuntur, adeoque vis in ipsis non deficit qua constringi & coarctari possint, nam quoties vesiculæ trachæales aëre inflantur, Pulmones turgere oportet, ac per consequens tam membrana exterius Pulmones cingens, quam fibræ musculares tunicæ ductuum trachæalium distractionem patiuntur, quæ harum partium vim elasticam exsuscitans ad contractionem sollicitat, verùm membrana Pulmones exterius cingens contracta Pulmones premit, & fibræ musculares ductuum trachæalium constrictæ latera vesicularum intus reducentes, earum cavitates angustant, ergò cum hæc eodem tempore contrahantur, ab his quoque premi Pulmones, & aërem ex ipsis expelli oportet, sed exspiratio fit, dùm Pulmones comprimuntur & aër ex ipsis expellitur quare patet propositio. Hæc constrictio vesicularum à fibris muscularibus facta, utilis & necessaria videtur in loquelâ, cantu tunc aër unico thoracis actu inspiratus, partitis vicibus & quasi pluribus actibus è Pulmone egredi videtur.

P R O P O S I T I O X I I ^a.

Tanta est omnibus animalibus respirandi necessitas, ut semel inchoatâ respiratione sine vitæ detrimento aëre aliquandiù carere nequeant.

Respirandi necessitas ab Hyppocrate jam dudum fuit observata, cibo enim & potu, inquit, per dies aliquot carere possumus, at interceptis respirandi viis ne unam quidem horulam vitam ducimus; porro cùm aliæ quævis actiones intervalla quietis admittant, sola respiratio est à quâ numquam desistunt animalia. Sed non est ut in re adeò evidenti ad auctoritatem confugiamus, cùm experientia in omnibus animalibus hoc idem demonstret, quodcumque animal in machinâ Boylianâ exanthlato aëre, moribundo simile collabascitur, ac revera moritur nisi aër in recipiens brevi immittatur, quanquam tamen non omnia æque citò in recipiente moriantur, quædam enim sunt, quæ ex haustoa ère tardiùs, aliaquæ citiùs obeunt; omnibus tamen certissima mors est si etiam minus horâ in exhausto recipiente relinquuntur. Idem quoque probat experimentum Domini CROON qui coram præside, sociisque aliquot Collegii Regalis Londini pullum Gallinaceum manibus prehensum datâ operâ suffocavit, eo usque ut ne minima quidem vitæ scintilla superesse videretur, idem tamen per trachææ rimulam insufflato aëre pusillum animal ab orcò revocavit, neque hanc veritatem ullo modò infirmat ars illa urinatorum per quartam partem horæ aliquando sub aquis sine respiratione morantium, cùm usu & consuetudine factum sit, ut respirationis defectum diutiùs quam cæteri homines sustinere queant.

An verò Pisces respiratione ad vivendum indigeant dubium moveri potest, cùm in aquis vitam agant neque in aëre ut terrestria animalia vivere possint, quâpropter nec Pulmones habent, nec locus, ubi vitam agunt, ad aërem hauriendum commodus esse videtur. Plura tamen sunt quæ aërem etiam piscibus perutilem esse demonstrant. 1°. Pisces ad aquarum superficiem sæpè ascendunt donec aërem attingant. 2°. In stagnis subito moriuntur si aquarum superficies sit undiquè congelata. 3°. Pisces in tubis vitreis aquâ completis ore obturato suffocantur, ut ron-deletius expertus est.

4°. Piscibus in recipiente machinæ boylianæ exhausto aëre idem ac avibus & quadrupedibus contingit, ut Clarissimus BOYLE in anguillâ expertus est, quam vivam in recipiente posuit, quæ exhausto aëre post aliquam ultro citroque motionem aliquomodò affici videbatur, cumque aër obstinato & indefesso conatu exsuctus fuisset, resupino se convertit ventre, quomodò moribundi Pisces solent, & ex eo tempore mortuæ similis immota jacuit, ac tandem aëre rursus illapso motionibus suis æque vividam ac priùs semetipsam ostendit. Cochlea verò testacea recipienti inclusa aëre exsucto vitro tenaciter adhæret, neque in progressu suo per recessum aëris impeditur. Quæ apertè indicant aërem etiam piscibus esse necessarium, quosdamque ex iis esse qui hujus defectum faciliùs sustinent.

P R O P O S I T I O XIII^a.

Non idem tamen omnibus animalibus est respirandi modus, ac idcirco varia respirationis organa diversis animalibus natura concessit.

A Deò sapienter omnium animalium conservationi natura prospexit, ut creatoris sapientia non alibi magis quam in animalium formatione atque structurâ splendeat, quibus enim plurimi aëris erat necessitas iis quoque Pulmones majores largitus est, quibus verò opus est pauci aëris, iis etiam Pulmones minores, aut alia organa Pulmonum vices gerentia concessit, ut quod aëris ipsis opus est haurire possint. Homo, quadrupedes & aves in pectore Pulmones habent, quorum moles animalis cujus sunt magnitudini respondet, in bombyce & insectis vesiculæ dorsi longitudinem excurrentes, & vasis sanguiferis contiguæ observantur, quæ nullatenus communicantes ductus aëris breves & cœcos constituunt, inde insecta moriuntur, quoties in dorso oleo inunguntur, præcluso videlicet aëris ad istas vesiculas ingressu. Branchias loco Pulmonum piscibus natura dedit, ut aërem in poris aquæ contentum haurire ac aliquomodò respirare possint, hæ autem constant ex radiosis quibusdam semicirculis quorum alii aliis incumbunt, vasa sanguifera usque ad radiorum apices excurrunt, osseum operculum adjungitur, aqua jam admissa atque ab osseo operculo compressa ra-

dios coarctat, adeoque & vascula per illos propagata, comprimit, quo fit ut subigatur sanguis in illis contentus atque ad motum cieatur, atque è poris aquæ compressæ expressus sui juris fiat. Sicque respiratio aliqua in piscibus exerceatur.

Quare patet aërem omnibus animalibus esse necessarium, sed diverso modo ab ipsis hauriri, seu animalia variè respirare, adeoque naturam animalibus diversi generis diversa respirationis organa concessisse.

P R O P O S I T I O XIV^a.

Fœtus in utero non respirat, imò ex eo exclusus modò suis involucris obvolvatur, aliquamdiù absque respiratione vivere potest.

QUamdiù fœtus in utero concluditur, tandiù more plantarum absque respiratione vivit, quia commercium nullum cum aëre externo habet, & musculi respirationis in quiete sunt, deest enim stimulus liquidum nervorum ad ipsos sollicitans, cum nec fauces aër elasticus, neque Pulmones sanguis succutire possit, nam sanguis à dextro cordis thalamo per canalem arteriosum in aortam descendentem ducitur, quia Pulmones flaccidi atque depressi viam ipsi facilem denegant, ac propterea cum aër purus & elasticus in utero deficiat, & sanguis per Pulmones fœtus non circuletur, nulla esse potest in fœtu respiratio. Ex eo factum est, ut circulatio sanguinis in fœtu penitiùs differat à circulatione quæ fit in adultis, etenim ne Pulmones fœtus respirationis incapaces ob aëris puri & elastici defectum, sanguine infarcirentur, humanæ machinæ conditor ipsum è dextro cordis sinu per canalem arteriosum ad aortam descendentem movit, sanguis verò qui per venam cavam conversus ascendit per foramen botale ad venam Pulmonarem ducitur, ut sanguis sine Pulmonum ministerio utrique cordis ventriculo suggeratur; quare patet primæ partis hujus propositionis veritas.

Ultima verò propositionis pars, nempe fœtum ex utero exclusum suis involucris obvolutum sine respiratione aliquamdiù vivere, ex jam dictis facile intelligi potest, quandoquidem aër externus fœtum secundinis suis obvolutum tangere non potest
nihil

nihil est quod tum liquidum nervorum ad musculos respirationis determinet, unde hi muscoli à contractione ut antea feriantur, ac per consequens nulla thoracis dilatatio, nullus quoque aëris ad Pulmones ingressus unde nulla respiratio, cum primus respirationis actus pectoris dilatatio sit, quia quamdiu foetus in utero concluditur, tamdiu thoracis contractio est; quapropter non difficilis videtur solutio hujus problematis quod Harvœus Anatomicis proponit, cur foetus ex utero eductus, modò secundinis involvatur, citra respirationem aliquamdiu vivat, sin post inceptam respirationem respiratio illi præcludatur quam primum expiret.

P R O P O S I T I O XV^a.

Plures respirationis usus proponuntur, & facto singulorum examine præcipui ac necessarii indicantur.

QUANTÆ sit utilitatis respiratio, ex hoc satis evincitur quod pluribus exercendis humanæ machinæ functionibus inferviat.

1^o. Loquela sine respiratione esse non potest, mutusque homo esset sinon respiraret, cum vox nihil sit præter quasdam aëris è Pulmonibus per trachæam exeuntis modificationes, quantum verò necessaria sit loquela ad societatem hominum statuendam atque regendam neminem latet, ac propterea quam utilis sit respiratio ex hoc satis patet. 2^o. Respiratio degluti-
tioni quadantenus infervit cum ab aëre in fauces irruente solida, liquida que præsertim ad Æsophagum pellantur, ut suctionis exemplo manifestum est.

3^o. Halitus copiosi è Pulmonibus cum aëre expirato excernuntur, qui intra vesiculas Pulmonares retenti damna plurima Pulmonibus afferrent. Alios minoris momenti usus taceo, ob quos tamen unicè institutam fuisse respirationem veritati consonum non est cum œconomia animalis absque his usibus subsistere possit, quæ tamen sine respiratione citò destruitur, ac propterea ex eo inferre licet alios esse & utiliores & magis necessarios respirationis usus.

Verum Re attentius consideratâ, respirationem ob hoc unicè

institutam fuisse videtur, ut circulationem sanguinis Per-pulmones promoveat, tantum enim sanguinis dexter cordis sinus per arteriam Pulmonarem ad Pulmones, quantum sinister per aortam ad reliquas corporis partes impellit, adeoque Pulmones molles & flaccidi impares esse videntur, ad tantam sanguinis quantitatem regendam atque fovendam nisi aliqua vis ipsis subsidio veniat, ergò vim elasticam aëris in Pulmones descendentis naturam opportunè adhibuisse videtur, ut tanta sanguinis copia per substantiam Pulmonum mollem & flaccidam regeretur atque expeditè moveretur; etenim dùm aër in Pulmones irruit, vesiculas Pulmonares quantitate suâ & præcipuè elatere inflat, * quibus turgentibus, vasa sanguifera per ipsas dispersa, sicuti & ea quæ rete membranaceum vesiculas trachæales ligans constituunt * explicari & elongari oportet, quò fit ut sanguis per viam magis directam atque patentem agatur, & vasa majorem tensionem adepta, validiùs oscillent, & circulum intra Pulmones expeditiùs agendum sanguinem urgeant, quo dato auxilio Pulmones totam illam sanguinis quem accipiunt molem regere atque movere possunt, præterea sanguis, dùm pulmonum vasa percurrit, per-tot viarum anfractus movetur, ut repetitis vasorum oscillationibus, premi, contundi, ac dividi tandem oportet, ex quo fit ut sanguis qui per venam pulmonarem ad cor reducitur, fluiditate & Rubedine illo magis splendeat, qui è sinu cordis dextro, per arteriam in pulmones pellitur.

Verùm tametsi aër inspiratus circulo sanguinis intra pulmones absolvendo tantopere profit, non tamen eodem tempore uterque motus fit seu sanguis ad pulmones à corde contracto necessario non pellitur, dùm dilatato thorace, aër ad vesiculas pulmonares descendit, hoc enim manifestum est. 1°. Quia motus cordis citiùs respiratione absolvitur, id est dato eodem temporis intervallo, plures sunt contractiones cordis quam respirationis actus. 2°. Quia remissa imò aliquandiù interruptâ respiratione motus cordis tamen non desinit. 3°. Contractiones cordis accelerantur, dùm respiratio eundem tenorem servat,

* Ut suprà propositione decimâ probatur.

* Ut propositione tertiâ de Pulmonum structura probatur.

Ex quibus manifestum est respirationem & motus cordis, non esse motus isochronicos, quanquam horum unus sine altero diù perseverare non possit.

Ex expositis facilè intelligi potest, cur homo sine respiratione diù vivere nequeat, cum hæc ad circulum sanguinis, in quò vita animalis consistit tantopere faciat, adeòque cessante respiratione, motum sanguinis in orbem perire, ac per consequens animal mori necesse est, quæ ex suprâ expositis adeò manifestè deducuntur, ut in iis probandis diutiùs immorari inutile prorsùs sit, quapropter ad examen alterius usus quem nonnulli respirationi concedunt nos convertamur, qui asserunt inspirationis tempore partes aëris puriores, subtiliores atque tenuiores è vesiculis pulmonaribus in cavitates vasorum sanguiferorum per poros traduci, adeòque sanguini intra pulmones circumculanti spirulas aëris tenuissimas admisceri, quæ tantam fluiditatem, atque Ruborem adeò splendentem ipsi conciliant, plurà sunt rationis momenta quæ huic opinioni favent, atque assensum ei arrogare videntur.

1°. Sanguis dissimilibus partibus sphaericis tamen aut ad figuram sphaericam proximè accedentibus compositus plurima interstitia habet æthere & aëre subtiliori replenda, quod præterea ex experimentis Boylei manifestè evincitur, Verùm duæ tantummodò viæ aëri sanguinem subeundo patent, viæ chyli, & pulmones, sed aër qui per viam chyli ad sanguinem ducitur, non purus, non elasticus est, sed pluribus halitibus foetus, ergò sanguini nocuus potius quam utilis, adeòque pulmones viam aptiorem esse videntur, quâ aër purus & subtilis sanguini misceri possit.

2°. Sanguis morâ nigricans & veluti lividus factus Ruborem pristinum ac splendentem solo aëris contactu acquirit, ergò Rubor rutilans sanguinis venæ pulmonaris spirulis aëris quibus ille in pulmonibus saturatus est, potius debetur, quam pressuris atque variis tensionibus, quas sanguis in transitu per ductus pulmonum anfractuosos sustinuit.

3°. Mutato aëre variæ sanguini accidunt mutationes, sic qui in aëre humido & crasso sæpè ægrotabat, integrâ sanitate potitur, si ad aërem sicciorem ac tenuiorem se conferat, & viceversâ. Porro quot homines ex diuturnis ægitudinibus irritâ medicamentum vir-

tute aëretantum mutato convalescunt demùm cur homines qui loca montana & excelsa habitant, vitam salubriorem longioremque degunt, nisi quia aërem subtiliorem & puriorem hauriunt, verum ut intelligatur, quomodò spirulæ aëris has mutationes afferant, quid in sanguine possint paucis exponamus. Quandòquidem spirulæ aëris sunt quid tenue & elasticum, poros sanguinis suâ tenuitate subeunt, ibique calore loci se expandere nitentes, partes sanguinis integrantes continuò à contactu repellunt, quò fit ut partes humorum minus cohærentes cavitatibus & inflexionibus vasorum faciliùs se accommodent, verùm quò minor est liquidi cuiusdam partium cohæsiò, eo quoque vi prementi minus resistit, ergò sanguis sic constitutus à vasis oscillantibus multo faciliùs premittitur, atteritur que, unde & majorem fluiditatem habet, ac partibus extraneis quibus exoneratur se liberat.


4^o. Tantam humorum molem perpulmones movere inutile prorsus videtur, si sanguis in ipsis nihil accipiat, adeòque circulus sanguinis perpulmones potiùs nocuus quam utilis videretur, cùm ex eo magna sæpe incommoda animalibus accidant, unde æconomiæ animalis conservatiòni forsan meliùs sine respiratione consultum fuisset, nisi tantum ex câ bonum accidat, quod mala sequutura compenset, ergò ex hoc conjici posse videtur sanguinem in pulmonibus circumferentem ex aëre aliquid sibi necessarium accipere.

5^o. Hydrargirum, partes nonnullorum purgantium, aquæ thermæ, imò aqua vulgaris poros vasorum cutem perreptantium subeunt & sanguini miscentur, quantò magis partes aëris subtiliores poros vasorum pulmonarium pervadent, dùm in vesiculas trachæales subitò illapsæ elatere fruuntur, ac undequaque se expandunt, tunc validè in latera vesicularum impellentes, vasa priùs depressa tendunt, qua tensione atque elongatione pori eorum ampliores facti partes aëris subtiliores cavitatem vasorum elatere suo ingredi nitentes admittunt.

Quod sanè demonstrare videtur experimentum silvii & Suammerdami quò aër per trachæam in pulmones adhuc calentes immixtus, ac lentè intra horum substantiam pressus, tandem in vasa pulmonaria, cordis que sinus penetrare dicitur, sed adhuc de aëris impressione ex vesiculis in venas pulmonum minùs dubitarè sinit experimentum hoc facilè & exploratum, quò

quò injectus oris halitus , non minus quam immissa aqua tepida , non limpida tantum sed etiam (quanquam difficiliùs paulò & tardiùs negotium succedat) colorata in lobi alicujus pulmonum canis , vel animalis alius ductum bronchialem , continuatâ aliquantisper injectione , nunquam non per venam pulmonarem cum spumâ redire observatur , etiam si nulla adhibeatur compressio lobi pulmonis. Cui opinioni favet autoritas borelli , Bohnii , Truistonis & Clarissimi Mayou , qui non aërem sed partes aëris nitrosas à vesiculis in venas pulmonum intromitti opinatur. Quibus Tandem Bellinum adjungemus , qui in tractatu de motu cordis posito aëris folliculi obtusum ovi verticem occupantis in liquidum amnii ingressu , aërem quoquè è vesiculis in venas pulmonum intromitti concludit , nam ut inquit ubique par est nisus ingrediendi , & par resistentia , cum aër tunicas ejusdem crassitie in utroque pervadere debeat , liquidum enim amnii ab aëre in folliculo contento tum crassitie secundæ tunicæ putaminis tenuissimæ , tum crassitie membranarum tenuissimarum constituentium sacculos albuminis separatur , corpora autem quæ media sunt inter aërem pulmonis & sanguinem sunt similiter duæ tunicæ , quarum altera est quæ constituit folliculos pulmonum tenuissima & altera adhuc tenuior quæ constituit Capillares Ramulos canalium sanguinis , qui per membranas folliculorum ducuntur. Si igitur aër dum per utramque crassitiem nititur se agere , oïi impedimenta superet tam ratione membranarum quæ mediæ sunt inter ipsum & liquidum amnii , quam ratione virtutis seu proprii nisûs , & cavitatem amnii perrumpat , & ejus liquido se immisceat , etiam aër pulmonis tam ratione impedimentorum , quam facultatis illa superaturæ , eadem impedimenta superare poterit , & re ipsâ superabit , & sese agat intra cavitatem Canalium sanguinis , & cum sanguine se miscebit. Quæ elegans meditatio nescio quid veri secum affert ut assensum sibi faciliè conciliet.





ERUDITO
D. D. ANDREÆ MILLOT,
PRIMUM MEDICINÆ,
GRADUM AMBIENTI.

Veram Respirationis causam explicanti.

Nunc ovet & latè fundat Burgundia plausus,
MILLOTUS, nostri gloria summa chori,
Nascitur, & phœbi dilectus, vera salutis
Spes, felix tantum quæ genuisti virum
O Burgundia, ter felix, sua tempora semper,
Dulcia si fuerint, quæ meliora meis.

*Sic offert in aeternum amicitiae monumentum ANTONIUS
CAIROL Doctor Medicus Monspeliensis.*

E I D E M.

W Ira patent Doctis MILLOTI signa Laborum,
I Nvida, siquæ sint, censorum tela tuorum,
I Ætus, ovans que premis, justus namcingit Apollo,
T Auirferis frontem fertis virtute paratis.
O Mnigenos jam dira stupent præfagia pestis,
T E tamen incolumi fugient præclara docente,
U Italis quibus aura datur, constetque perennis,
S Cande Triumphales partas sic, dogmata laudes.

*Hæc in perpetuum amicitiae testimonium scripsit GARROTUS
FITZGERALD Hybernus D. M. Monspeliensis.*

E I D E M.

S Ublimi genio narras quæ spiritus arte,
Viribus alternis adducitur atque reflatur:
Cur Pulmo cursus iterans, iteransque recursus,
Cogitur exiguo post tempore flare reflare,
His utare precor, donec post mille Labores,
Quidquid habet natura, pari detexeris arte.

*Hæc suo cecinit amico Guingualæus OLIVIER
VILLENUEVE D. M. Monspeliensis.*

E I D E M.

Perge decus MILLOTE tuum nomenque per orbem;
 Sparge Libris, raras pande salutis opes:
 Omnibus ostendis solers puri ætheris haustus,
 His superi jubeant ut potiare diu.

*Amico candido sic ovans applaudit STEPHANUS
 HUGUES Spinalensis apud Lotharingos Lib. Art.
 Mag. Med. Baccal. & Universitatis Consiliarius.*

E I D E M.

MIRA naturæ genio sagacis,
IN diem profert socius triumphans,
MILLOTE Ynceis aurâ potimurque ut ipsi,
ILOTUS Ultrat ocellis,
TPs diu spirantem humero lubenter,
UTa gestabit tribuet decoro,
SOLUS Era phœbei capiti que daphne,
 Erta Laboris.

*Sic de amici Solertiâ & merito Augurabatur
 CAROLUS BERGIER Pontisœallensis apud Se-
 busiannos Lib. Art. & Med. Baccal.*

E I D E M.

ARtis Apollineæ penitus dignoscere fontes,
 Omnibus haud facilè: sed respiratio monstrat,
 Ardua cùm pandis, quantum sit mentis acumen.
 Si fuerit quondam flatûs malè cognitus usus,
 Lassavit que diu scrutantum corda sophorum,
 In lucem dum prodit opus, quot condita pandis,
 Gaudia testatur, miraturque alta * deorum *
 Sedes * dùm tantas dotes agnoscit in uno.
 * Altissiodorum.

*Obtulit amico suo & concivi hoc æternum amicitia pignus
 JOANNES CLAUDIUS BERAULT Altissiodoreus
 apud burgundos, Art. Lib. Mag. & Med. alumnus.*

E I D E M.

VOs phœbi comites umbrosos linquite montes,
 Unanimi & plausu nostrum cantetis achatem,
 Ille suis meritis resonavit Apollinis aulam,
 Solus erit dignus certando referre coronam.

*Obtulit amico suo in æternum amicitia monumentum
 MARINUS COUALLIER DE CHAMARIN, Altissiodoreus
 Art. Lib. Mag. & Med. alumnus.*

E I D E M.

Pulmonum pulsus alternos promere solùm,
 Te decet, ac flatus subeuntis pendere vires;
 Sic corpus deceat firmum cui sæcula spirant,
 Quod nectant animæ spiranti grandia quæque.

*Posuit in æternum amicitia monumentum JOANNES
 DOMERGUE Landaviensis. Art. Lib. Mag. &
 Med. studiosus.*

